

太上老君說五斗金章受生真經

爾時

太上老君 在太清境上 大赤天中 黃金殿內

召五老帝君及 東斗注生君 南斗上生君

西斗記名君 北斗落死君 中斗總監君

九天生神君 九天注生君 九天注祿君

九天掌籍掌算君 九天財庫祿庫君 九天

消災散禍君 九天聖姥元君 九天太乙元

君 九天監生大神北斗七元星君 南斗六

司星君 本命元辰建生星斗君 各隨本部

功曹靈官

金童玉女 無量聖衆 一時同會 稽首禮拜

燒香散花 步虛旋繞 長跪帝前 諦聽法

言

太上老君 廣宣要妙 告示五方五老 一切聖
衆曰 吾昔於混沌之中 天地未分 元化
體一 布氣十方 成就萬象 生天生地 負
陰包陽 陽氣上升 化生諸天 陰氣下降
化生諸地 陽之餘氣 化生男子 陰之餘
氣 化生女人 陰陽二氣 混合自然 生生
化化 乃有人倫 既有人倫 宿命因緣 有
善有惡 有長有短 有貴有賤 有富有貧
善惡之報 如影隨形 如回應聲 作善善
應 作惡惡成 種蘭得香 種粟得糧 爲善
降祥 爲惡降殃 一切因緣 皆由福業 且
人生下 命系上天 人之生也 頂天履地
有陰有陽 各有五行真氣 各有五斗所管

本命元辰 十二相屬 且甲乙生人 東斗
注生 丙丁生人 南斗注生 戊己生人 中
斗注生 庚辛生人 西斗注生 壬癸生人
北斗注生 注生之時 各稟五行真氣 真
氣混合 結秀成胎 受胎十月 周回十方
十方生氣 包羅元始 杳杳冥冥 其中有
精

恍恍惚惚 其中有物 視不見我 聽不得聞
離種種邊 名為妙道 妙道在人 不可輕
失 失之甚易 保之甚難 多迷真道 多
逐邪源 多好淫殺 多好貪嗔 多沉地獄
多失人身 受生之時 五斗星君 九天聖
衆 注生注祿 注富注貧 注長注短 注

吉注凶 皆由衆生 自作自受 若人在世
之日 心崇大道 供養

天尊 孝順父母 和仝六親 不嫉不妒 不貪不

淫 或持齋戒 或作善緣 或受三戒 五戒

十戒 十二可從戒 十四持身戒 二十四

戒 三十六戒 七十二戒 一百八十戒

三百大戒 或修上清齋 金籙齋 三元齋

三七齋

庚申齋 甲子齋 本命齋 如是齋戒 若有善

男子善女人 受持之者 名係天人 世世

生生 不失人身 富貴聰明 人中殊勝 五

體具足 十相端嚴 各降真氣 金章靈符

混合自然 化生爲人 吾今宣說

東方第一金章靈符真文神咒

東方九氣 始黃青天 青靈始老 九氣天

尊 真人按筆 下注人身 木德結秀 會道

合真

南方第二金章靈符真文神咒

南方三氣 赤靈丹天 丹靈真老 三氣天

尊 司命司祿 降闕尊神 火德明秀 會道

合真

中央第三金章靈符真文神咒

總監衆靈 十二之天 玄靈黃老 十二天

尊 都籙校籍 主鎮脾神 土德鎮秀 會道

合真

西文第四金章靈符真文神咒

西文七氣 太白之天 皓靈皇老 七氣天

尊記名安魄 主鎮肺神 金德堅秀 會道
合真

北方第五金章靈符真文神咒

北方五氣 玄中之天 五靈玄老 五氣天
尊 追生落死 主鎮腎神 水德善秀 會道
合真

爾時

老君再說此五方 真文神咒 即召五方五斗星

君 降此靈符 真文神咒 各授五斗星君
即以金書玉籙 各依其方 總得受持 注
生世人 以此靈文 安鎮五臟 各鎮人身
凡人性命 皆由九天生氣 五斗星君 本
命元辰 主掌靈神 若複有人 能知根本
但遇三元五臘 本命元辰 北斗下日 嚴

置壇場 隨力章

醮 供養五方五老帝君 乃吾化生 注生聖

衆 五斗星君 本命元辰 醮獻錢財 以答

衆真 注我生身 得生中國 得遇大道 蔭

佑之恩 當生之時 天曹地府 願許本命

銀錢 且甲乙生人 命屬東斗九氣 爲人

受生之時 曾許本命銀錢 九萬貫文 丙

丁生人 命屬南斗三氣 爲人受生之時

曾許本命銀錢

三萬貫文 戊己生人 命屬中斗一十二 爲

人受生之時 曾許本命銀錢 一十二萬貫

文

庚辛生人 命屬西斗七氣 爲人受生之時

曾許本命銀錢 七萬貫文 壬癸生人命
屬北斗五氣 為人受生之時 曾許本命銀
錢 五萬貫文 若有善男信女 種諸善根
善根不斷 世世為人 當許醮送 五斗本
命錢財 天曹地府 各有明文 十二本命
十二庫中
子生之人

第一庫中 辰生之人 第二庫中 申生之人
第三庫中 亥生之人 第四庫中 卯生之
人 第五庫中 未生之人 第六庫中 寅生
之人 第七庫中 午生之人 第八庫中 戌
生之人

第九庫中 巳生之人 第十庫中 酉生之人

第十一庫中 丑生之人 第十二庫中 乃
是生人 各自財祿 若有本命之日 依此
燒醮 了足別無 少欠即得 見世安樂
出入通達 吉元不利 所願如心 自有本
命星官 常垂蔭佑 使保天年 過世之時
不失人身 得生富貴 文武星臨 財星祿
星 五福照耀 身命胎宮 安樂長壽 不值
惡緣 若有男女 生身果薄 無力章醮 可
於本命之日 請正乙道士 或一或二 或
三或五 或于宮觀 或就家庭 持誦五斗
金章寶經 或以自願持念 每誦一遍 折
錢一萬貫文 又志心持念 托受生天尊
或千或萬 當來托生 人中三世

長為男子之身 五體全備 十相端嚴 一切

恭敬得遇無上正真之道 是時五方五老
帝君 九天聖衆 本命星君 元辰星君 功
曹靈官 玉童玉女 一會神仙 得聞

老君說此真經 一時歡喜 禮謝玄元 各願受
持時有始老帝君 出班長跪 而作偈曰 稽
首禮謝 珍重而退

稽首真元無上尊 一心信奉不思議

如斯妙法未曾聞 今日今時盡得知

能為黑暗開光明 能為疾病作良醫

妙哉神咒五靈符 誓願皈依各受持

太上老君說五斗金章受生真經竟